

《中國地方藝文薈萃》總發行

學苑出版社

中國地方藝文薈萃

蘇東奇·第一輯 伍

華東卷・第一輯 伍

中國地方藝文薈萃

《中國地方藝文薈萃》編委會 編

第五冊目錄

邗上題襟續集不分卷

建陽詩鈔二卷

邗上題襟續集不分卷

邗上題襟續集不分卷

（清）曾燠輯

據清嘉慶兩淮官署刻本影印。

題襟集出越歲而贈答燕遊之作又已成帙余聞
一編其主客之工力悉敵也其後仿爲題襟者雖西
酬唱同文館唱和南嶽唱酬月泉吟社玉山名勝荆南
唱和海岱會諸集雖衆音繁雜間有高下而約略計之
其主客各亦相當惟坡門酬唱主勝於客耳若前乎漢
上之松陵集高氏三宴詩不且強客壓主耶余本薄殖
又蚤從簿書未能肆力於風雅徒以性之所近周旋諸
作者間蓋怯戰久矣主不如客夫何待言然而邾莒之
國不廢會盟庶幾藉此務自繕脩振其積弱且不敢沒
諸家之美故復梓是編而行之嘉慶二年四月南城曾
燠序

邗上題襟續集

西溪漁隱圖爲賓谷都轉題

德化陳奉茲東浦

西溪非貴鄉而君於焉漁豈無麻源谷奧曠殆不如問
君何以得佳遊十年初問君何時去日夕未或疎揚州
烟花深眼中一事無平生有畫卷落筆傾駢珠古來溪
上人厯厯逢招呼徵事及栗里開懷尤感予山氣領朝
暮林光混榮枯石出潭集網梅開冰上魚攜具隨所務
刺船不用奴迴轉古蕩間未肯出西湖嘗恐人境迫有
妨歌嘯舒知君抱遠性豈不同嬾夫急札索其詩妙語
逼腐儒書生切已事一世乃此須

來札云此圖生
員切已之事

擔當

自局內結習猶空虛所以豪傑士曠然翔亨衢我心願
同歸我退不可需雖無天下勝甘棠息桑榆

甘棠湖
在敝鄉

鉛山蔣知讓師退

先生胷中極天遊巨鼇早掣珊瑚鉤東溟乘興一掌收
坐嘯江左淮南陬長綸餌繫九牯投凡髻不挂靈物畱
舊遊忽憶林塘幽西湖之西西谿頭一竿一笠一葉舟
宜冬宜夏宜春秋蹟所未到意每周六合未足供冥搜
當沈而沈浮而浮豈慕漁釣輕公侯被豐貂若五月裘
濟大川等百步流眼中騰擲紛蛟蚪遐心獨契忘機鷗
谿邊老漁無遠謀舉網那計鯁與鱸村釀換得醉卽休
不知更有大九州先生漁非魚之求先生隱非漁之儔

西溪溪路非阻脩聊同屏上圖滄洲

袁簡齋前輩八十生日以詩爲壽

曾燠

碌碌如庸人百歲有何益營營若勞者千春亦虛擲
迺若言詩家工者例窮迫又云鈎物情未老髮先白
清福與盛名兩美不兼得天命巧酌劑此豐而彼嗇
異哉隨園叟今世生使特享名六十年爲樂三萬日
日日繫以詩不減長慶集文章有天幸繫豈盡人力
我似會昌人尙見香山客

白沙翠竹江村八詠

曾燠

漑巖

假山若臨畫生氣苦索然不圖檻戶間日夕浮嵐煙古
人一邱壑自謂所得偏客去主不來巖光空自鮮

見山樓

園裏山易窮園外山逾多江南無數山江北能收羅飛
雲濕畫棟遠翠搖簾波我思挂頰看不免桓公訶

簌簌徑

炎曦不到地蒼雪亂如雨天半聲瓏玲時聞鳳鸞語坐
深使人澹始覺塵囂苦且復效子猷終當作蔣詡

芙蓉泚

冉冉清露氣泛泛初日光橋下千芙蓉橋上人衣香何

時謝簪紱集之以爲裳母令茱萸泝專名但裴王

桃花潭

紅芳逐水去綠樹映水深風燕新引雛徘徊此亭陰對
時感韶光窺景空塵心漁父可曾到竊愁無處尋

香葉山堂

懸崖屋三間其前有雙柏簷端發竽籟白晝起暝色想
經鳳鳥棲足供山人食葆此後凋性媿彼先零質

因是菴

一切有是因皆以無因結一切無是因皆以有因滅如
是觀自在去來兩無涉我雖門外漢言下能了徹

小山秋

淮南王去後仙種畱人間隱者招不來坐使秋光閒我
家華子岡桂樹凌寒山山靈應見怪問我何時還
龍山慈孝堂歌

宋末歙縣鮑氏父子遇賊龍山松樹下兩爭死以求
一全賊兩釋之其後嗣曾建慈孝堂奉祀久傾圯今
封翁誠一重脩繪圖請題

曾燠

白翎雀來天水碧十三陵血鴟啼赤武林龍山荆棘中
何況新安一片石新安山上松青青鮑家父子茲避兵
黃巾赤眉嘯餘黨眼中白骨堆縱橫俯者如橋仰者梓
不望兩全但爭死松聲慘淡啼聲哀天日無光暮山紫

山風曾灑當時淚山木已凋前代翠祠堂肯構到宗祏
圖畫流傳同史事嗚呼萬松嶺上斜陽殷父子龍髯誰
爲攀南渡湖山如繡錯兩宮遺恨不生還

楊州柳枝詞

曾燠

揚子江頭綠漲天蕪城一片是春煙春來何處無楊柳
不似揚州最可憐

隋家天子本無愁愛煞垂楊舞不休忽聽柳枝歌宛轉
春心漫憶廣陵遊

淮水春連江水春枝枝賜姓主恩新阿誰似爾風流甚
曾蔭三千殿脚人

絳僊睂黛寶兒腰妒盡東風一萬條今日飛花寒食節
玉鉤斜畔雨瀟瀟

謝傳舊居燕已平猶傳詠絮女郎名如今廿四橋頭月
但有歌喉囀曉鶯

春風十里始何時多少江湖杜牧之畫閣珠簾更變盡
長條依舊綰相思

仙人掌上有人過柳七荒墳蔓草多爲唱雨霖鈴一曲
曉風殘月奈愁何

歐公手植平山下千樹甘棠去後思白髮門生感三過
況於今日更攀枝

司理風情賦冶春虹橋飛跨綠楊津東君還復舒青眼

不見當時舊主人

曾沾雨露上林枝
三載移栽楚水湄
送客迎人都困倦
青青兩鬢已如絲

徐嵩

蕪城路北雷塘西
千枝萬枝高復低
行人早起行不得
殘月曉鶯生古堤

煬帝行宮鎖紫泉
嫩添春水綠添煙
斜陽萬古傷心樹
只隔雷塘數畝田

明月簫聲廿四橋
紅橋一帶水迢迢
十年彈指樊川夢
攀折長條又短條

揚州城郭邗江麋
鶯黃叢叢金縷絲
一聲水調二分月

嬌唱使君新柳枝

詹肇堂

阿師橋下清淮流謝傳宅前睂黛愁記得兒家傍湖住
緣楊城郭是揚州

樓頭墻角易斜曛露葉煙條遠未分不及玉勾斜畔草
年年青到阿廔墳

楊家故宅久榛蕪冷雨斜陽霸業徂一陣歸鴉壓枯樹
遊人猶認黑雲都

軟學腰肢淺畫睂兩船相遇鎮相隨生來願作虹橋樹
不識人間有別離

平山堂枕蜀岡隈閒客登臨倦眼開一樣白門煙翠色